



## Шоши мират емаң хатд постасув



Хор: Галина Граблевская

Унт дор тылащ яртъяңмет хаталан мув доватан шоши мир эх емаң хатд постада. Кашң тал, кушкепа там хаталан, шоши мират па нумалмидаят. Россия хон мувеван катсоткем шоши мир ул.

Ямал муван шошия ветъяң педа нийд щёрас хоят луңтасал, лув кутэдан хантэт, урат, селькупат. Нийлхус щёрас хоят тацан яңхал па худ велпасламан ул.

Там лапатан кашң вошан, кашң куртан хоятат емаң хатда актацисат. Канащ Пухадан «ЭтноФест» верыдыса. Кашң мир лув лэвпасал, думатты сохал алидыйс. Хол касты па якты доймтысат.

Надым вошан улты шоши хантылув хоттэд хоятдал, рутдал пидан кашң емаң хатда актацидат. Няврэмдал иса патан вуйдылдал. Щит элты Галина Граблевская (Тогачева) каматса ясаң ястас: «Няврэмат кеша турамсот ёнтопсайт верыдылув. Щи тумпийн мастер-классат хоша ищи ар хоят ёхтыдыйл. Эвет па нэңат щита сак элты каратты уталдылат, щашкан па пунаң сох элты хорамат ёнтыдылат. Похат ёх хоятатан юх элты нёхарты уталдайт, нёдат па юхдат верыдылат. Тамиты щи ияха актащиман муң няврэмлув ханты ясаң па вератты уталталдув».

Щи веран ханты мир йис улапса ант ушал, ант сохнал. Ин там йис няврэмата потартыты па альты верлув хув ат удлат, елды ат тудайт. Емаң хатд пидан! Тумтак ёщ, тумтак кур! Ойңа-пищаңа, йисаңа-нуптаңа!

Аллина Тоярова ханшам потар



Хор: Галина Граблевская

### Уважаемые северяне!

От всей души поздравляю вас с Международным днём коренных народов мира!

На Ямале этот праздник имеет особое значение. Коренные малочисленные народы Севера – неотъемлемая часть нашей большой семьи, хранители уникальных традиций, богатейшей культуры и древней истории. Ваша мудрость, бережное отношение к природе, самобытный язык и обычаи – бесценное достояние всего региона.

Сохранение и развитие культуры коренных народов – наш безусловный приоритет. Мы активно поддерживаем традиционные виды хозяйствования: оленеводство, рыболовство и промыслы. Совершенствуем меры поддержки, развиваем образование на родных языках. Особое внимание уделяем сохранению богатейшего культурного наследия. Создаём все условия для комфортной жизни и благополучия каждого представителя коренных народов. Вместе мы определяем векторы развития Ямала, стремимся к гармоничному сочетанию сохранения самобытной культуры и ответа на вызовы современного мира.

Искренне желаю вам крепкого здоровья, счастья, благополучия и процветания! Пусть мудрость предков и сила традиций ведут нас к светлому будущему!

Губернатор ЯНАО  
Д.А. Артюхов

### Дорогие северяне! Уважаемые представители коренных малочисленных народов Ямала!

Поздравляем вас с Международным днём коренных народов мира!

Этот праздник – всемирное признание неиссякаемой силы духа и бесценного культурного богатства, которое веками создают и бережно хранят коренные народы: ненцы, ханты, селькупы, коми.

Вы хранители традиционного уклада жизни и исторического наследия Ямала. Ваше мировоззрение, основанное на глубочайшем уважении к природе Арктики, почитании предков и крепких семейных узах, – это живой источник мудрости для всех. Умение слышать язык тундры, жить в гармонии с её ритмом и щедростью – ваш бесценный дар, который вы передаёте новым поколениям.

Благодарим старейшин, оленеводов, мастеров, педагогов и всех, кто вносит вклад в сохранение и передачу уникальных традиций коренных народов Ямала.

Желаем вам крепкого здоровья, благополучия, успехов в труде и семейного тепла. Мира и процветания вашим семьям и общинам!

Законодательное Собрание ЯНАО

# Общественной дипломатия ашкуда манас



Хор: Иван Сандрин

Ёмвош округан хон мув проект хуват «Школа общественной дипломатии» уйтантопса манас. Хон мув регионат элты хольмац хоят уталтыты ёхтыдыс. Ёхтам шоши мир хоятат Сургутан па Ёмвошан арсыр уталтаты харатан дэсэтыдысайт.

Муң округев элты сита хулам хоят ус. Кат ур нэ па йи ханты хоят – Иван Эдуардович Сандрин Дорвош район элты. Тадаң лапат лув уталтасайт: хоты кусяйт пидан рупатаел туты, шоши мир улапсайдув, верлув елды манты сира шавиты, шимлаң мир ёх ёрая тайты законат уятты.

Там уйтантопса шоши мир ёх объединениейт Хон мув МИД МГИМО пидан яха дэсэятсат. Рут мир верат туты Федеральной агентство па «Норникель» компания си кеша ун онтас версаңан.

«Каматса хатл със муң хулантсув па вантсув, хоты Ёмвош округан си вер манал. Оша версэв, хоты си рупата па регионатан тыйдыты рахал. Там уйтантопса лекция па практика пидан манас. Ёхтам хоятат уталтасайт, хоты община верат лув

улты мувладан па па муватан аратыман елды туты», – «Коренные малочисленные народы. Школа общественной дипломатии» программной куся ху Алексей Цыкарев ясаң верас.

Си уйтантопса элты Иван Сандрин па каматса ясаң ястас: «Ма хулам тал тохи ханшлтантыдысам. Туп хулмет талан кимет полуфинала вусайм. Кат тал онлайн сирн пилтасисам. Ин па ты ёхтыдысам, хон мув хуват ясаң туты хоятат пидан уйтантысув, потрэмисув.

Мет шопаң – вулды тащан яңхты шоши мир хоятат, кусяйт па мув шув па тут йиңк шепты тахайт хося рупитты ёх пидан яха вердал туты верытлат. Вуды тащан яңхты па худ велпаслаты ёх улты тахаятан рупатайт ки манлат, охан па пормасатан (хопан, мотуран, донсь хопан па па отатан) мадайт. Хой симась тахаятан улдат, договор нэпекат дэсэятлат.

Муң округеван симась вер антом. Хой вулды па худ велты тахайн улдат, улты тахайдала нэпекат ант вердайт».

Альбина Тырлина ханшам потар

## Няврэмат ашкудая акатты акция



Хор: priuralys.ru

Уталтыты тал питщатал елпийн, кашц тал, вошатан па куртатан «Няврэм ашкудая акты» акция верда. Хоятат лутастэл порайн, ашкудайн мосты молты молтас пормас лутлат па тохи малат.

Там пуш Приуральской район куша ху куртаң-вошаң хоятдал педа ищи щимац айкед верас. Акция хуват актап пормасат, ай куртатан улты, вулды хотатан касалты па худ велпасдыман яңхты хоттэдатан энамты няврэмата мойдалайт.

Ханшты юхат па нэпекат, щуратты ольпаң юхат, пластилин, оляп па аймты хошопат, кура думатты отат тутдыты хирьет па рюкзакаат. Ар мир яха пилтащман, актап мойлапса пормас яма акмал.

Няврэмата мойлаты пормасат Охсар куртан, Обская вошхулан улты 2А хота туты мосал, щита «Доверие» филиал ул.

Нын верты нэтапсайн, щит анта ал лутам пормасат, щит ай няврэмата шеңк ун амат па лувдала халэват педа шушматы ун юр па онтас.

Зоя Куртямова ханшам потар

## Лапатмет пуш верты яңхапса

### ЧЕСТНЫЙ МЯРШРУТ

Ямал мув губернатор Дмитрий Артюхов унт дор тылащ ихощъяңмет хатадан кашц тал округ доватан верыдыты яңхапсайл питщалды.

Там пуш герой Тада постаман ул – ин ляль харан улты па удам мохет пидан уйтантыйл. Щи тумпийн лув хоттэд хоятдал пидан. Щилта ныты питла, мосаң молты нэтопсайт ядпа па вердайт.

Тунял иты лув кашц вошан па куртан хоятат пидан уйтантыйл. Вантдалды, хоты сахат куцайт рупитлат. Муй хорпи ям верат хоятат улты тахаятан тыйсат. Тунял партыдыйм верат туңа-щира версайт муй па антом.

Тамашц яңхапса миран шеңк лавалда. Ванты, щи порайн кашц хоят верытал лув ёра верал элты инщасты. Щит шеңк ям, лув ясаңал мохты куца пада хойл, ёврая питам верал мохты туңмадал.

Ханшаты, ясаң вераты – мата курта муй па воша хойдыты мосал. Куцайын нын хоцайын ёхтыдыйл па нын пиданан уйтантыйл.

Аллина Тоярова ханшам потар



Там QR-код хуват доңаты па вантаты, муйсыр нэтопсайт СВО хоца улты мохета мадайт. Щи тумпийн нэңдала, няврэмдала, аңкидала па ащилдала ищи нэтопса вуты рахал.

### ОБЪЯВЛЕНИЕ

**ВРЕМЯ ДЛЯ ВАЖНЫХ РЕШЕНИЙ**

**5 000 000**  
РУБЛЕЙ В ГОД

**2 300 000**  
РУБЛЕЙ ЕДИНОВРЕМЕННО

При заключении контракта  
**на Ямале**

Подробности на сайте  
**contract89.ru**

# Ямал мува постама хатл манас



Хор: ЯНАО губернатор пресс-служба

Там пуш, хон мувев доват па па муват элты няврэмат щутщаты «Артек» центр сотмет талад постад. Щи хатлат кеша «День региона в Артеке». Моя многоликая Россия» проект хуват, лагерян Ямал мувев хатл манас. Сот тал хащам сыс, тамащ вантопса олац пуш верса.



Хор: ЯНАО губернатор пресс-служба

Ямал мува постама хатл, Хон мувев вотвой нох адмам веран пуншса. Округ куцаев Дмитрий Артюхов мойлапса ясац ястас па арсыр касапсаятан нох питыдыйм кат энамты няврэма сертификат нэпек катлаптас. Лын щаха, там нэпек хуват Ямал мувев хорамат вантты ёхатлацан.

Лагерян улты няврэмат, хатл сыс, «Окружной Дом ремёсел» хотан рупитты ёх пидан оцат лов элты хорамат нёхарсат, сак каратсат, аканят ёнтсат. «Сыра-Сэв» ансамблян рупитты мохетан арсыр щира якты уталтасайт. «Движение первых» айлат ёх пидан касты хара-

тан юращсат. Нуй па тал сах, молцац, кувц, саран шарапан па ханты ернас думатман хор версат, Овс мув ёнтотатан ёнтсат. Муц мувеван энамты лыпшат, торнат, юхат элты потар худантсат, кина вантсат па шай верты уталтысат. Етна пелка хорам сыйц концертан эталтасайт.

«Тамхатл муц ялап ям вер пуншсув. Сот тал хащам сыс, кашц тал, кашц сменаин, тата щутщаты няврэмата иса потартыса па алидыса, муй хорпи рут мир хоятат муц Хон мувеван улдат, муй ясацан потарлат, муй хорпи сох тайлат па маты мув сыдан улдат.

Туп «Артек» дыпийн рупитты яц лагерян, имохты худам щёрас молтас няврэма, талац хатл Ямал мув элты потарты, альты, якты, арыты, касты, каш туты, ёнтты па верантты харатан рупитты, тамащ хатл муц холна нэмоцты порайн ант верылысув. Муц Хон мувев шецк ун, хорамач па тащач. Мет волац тайты отэв, щит шоши мувеван улты хоятат. Мосач там хатл верам вантопса юпийн, тата улам няврэмат матты порайн нын Овс мувана яцхты номас пондат. Хой мосач улты па рупитты тохи манал», – «Артек» куца ху Константин Федоренко ястас.

## Ялап хот омасты ям вер

Мужи вошан тэдые ялап хот омасла. Тамхатл кеша лапат ар ятпи хот верла. Щи хотата мохты катсот педа лапат хоттэд улты щира, доцты верыгал. Хот омасты харал доваталан вет щёрас молтас квадратной метрая хойл.

Йи тамащ хот Совхозной вошхулан омасла. Катрая ювам хотат элты ялап хота касалты программа хуват, тата хольмац педа хулам хоттэд хот томанан мада. Хот омпсам порайн, хот илпийн улты мувал даварт каталты урацан, термостабилизация щиран лэцатса.

Ялап хотатан верты балконат тынац кеван сайдалайт. Мет шопаца хот ов хардал лэцатлайт: ай няврэмат ёнтты лотат, хоятат шушилдыты юшат па машинайт донццтаты харат.

Ин щита хот дыпи рупатайт манлат. Нови тут верла, систам йицк па хошам маты турпайт мосты щира пондайт. Ерт па нёцхал йицк мантыйн, хотат лап ант амарлаты урацан, каман улты турпайт лэцатлайт.

«Там йисан хот пуцалан улам ампарат нох лосытлайт. Лэваса ампар омасты па ант рахал. Ялап хотат балконат тайты па хот дыпийн, лэпац хорпи, ай хот ятые верла ки, хоятлува шецк ям. Куртан улты хоятат арсыр лывац тэдые тайлат, понты таха иса мосал», – Мужи вошан улты нэ Нина Анисимова ястас.



Хор: vk.com/popovolegshur

Зоя Куртямова ханшам потарцан

# Арат, дуңтарат ханшты нэ



ГОД ГЕРОЕВ  
НА ЯМАЛЕ

2025

Там лопасан потрэм Светлана Павловна Кельчина элты тулэм. Лув Лорвошан ул. Хуван лув пидэдан уйтаныты вутсисам. Хулдысэм, лув «Сорни най» группая арат ханшал. Холна дуңтарат ханшты нэ.

## Аңкел-асел нумман тайдалды

Светлана Павловна Катравошан сэма питас. Ащел шуңат Павел Николаевич Кондыгин, Ванты ху. Эвел аңкел-асел элты потар тус: «Муң Вантыйн, Тушвошан усув. Асем шуңат талан дован почта тутдыман рупитас. Си порайн ин яңхты тохдаң хопат антомат усат. Луңан худ, вой велман ус.

Лув Волаң Лялян няд тал лялясман ус. Одаң ийимел Катравош нэ. Ляль элты Катравоша ёхды ёхтас. Лялян удмал сыс, эвел няд тал довата йис, Лорвошан хотан маса. Яйдал, апсидал Вантыйн усат.

Катра порайн, холта хоят курал пурамал, мохты курт нэм тыйл.

– Ванта, курт си. Ситы Ванты тыйс, русь ясаңан Вандиязы.

Шиянпухар, Тушвош – ин Лысой горая аялда. Симась нэмат си удлат.

Хун ма сэма питсам, асеван муң мохты Лорвоша тудаюв. Муңев туп каслапталды, мохты антома йил. Сит 1962-мет тал ус. Си пора элты, Лорвошан удлүв. Ин няд няврэм туп хасьсув. Аңкем рупитты питас. Нэмад – Елена Андреевна Еприна. Асов элты ус. Мис хотан, юхат няврэм шавиты хотан рупитас. Ар рупата верас».

## Лув улты улапсайл

Светлана Павловна ийикел Аркадий Александрович Кельчин пидан ярхус тал яха усан. Яртыяң няврэм тайсаңан. Улапсайл элты па каматса ясаң ястас: «Мин Лорвошан усман. Ийикем худ велман ус. Ун аңкелан Лорвошан энмалса. Лув опрась нэмад Лонгортов. Ма нянь верты хотан рупитсам па ийикема нётсам.

Там мосванан, тал молтаса йис, ай похем Степан Аркадьевич Кельчин, нэпекан ёхатсаюв, ушас. Лэхуем, апсем похал Станислав Романович Кондыгин пидан, СВО хося манылысаңан. Яха ушсаңан. Нопсэм сикуш елды понлэм. Лыпем вевтам. Сикуш каншлэв. Хоты нэрылүв, елды улты па мосал. «Сорни най» группаеван арыты нэндаман пойкайдм.

Катра порайн аңкилүв, ун аңкилүв, ун асилүв арым арат нумдалдам. Муй силта худантысам, еша ясаңан нэ-тапдам, туңа вердалдам. Си ар соват еша арэмидам. Ун асилүв монсям монсят худантсув. Мет осьхуль тахая ёхатлат, воылат. Кимет хатадан потрэд елды тулэд. Си онтасан, ситы си усув. Хун ма ма няврэмлам энмалты питсам, иси хота ишкансяпан нэтылдысам, хота воялды аран арыслам».

## Муй сирн ханшты питас

Светлана Павловна ай пора элты худанты, арыты, ханшты ой тайс таңха. Ултад сыс, иса симась хоятат лув пуңдэдан усат. Ай порайн – ун аңкидал, ун асидал. Асован апсидал хося, 1973-мет талан удмалдан, одаң дуңтарат ханшты питас. Сита Прокопий Ермолаевич

нэпек уйтас. Ода лув ханшам дуңтардал емаң хатлатан луңтылдыс. Сит элты па потар тус: «Прокопий Ермолаевич – сит ма килэм, опем ики. Лув шеңк ар монсь, луңтар ханшилдыс. Кашң ханты курта яңхас. Хота худ велты таха, ныкды, нохды манал. Хоты худ велты хоятат усат, муй версат, иса вантас. Си хорпи хоят ус. Нэпеки хирал адэмалды, шанша понапдалды па ханшал. Муй ант уятты ясаңдал, нэпека мохты ханшапдалды. Ясаң сит ар сыра манал. Нумшак хоятат нумшак ясаңан потартлат. Ным хантэт – ным ясаңан. Иса нэпека постасды. Ар пелак худ велты хоятат элты ханшас».

Ин Светлана Павловна пенсиян ул, арыты яңхал. Емаң хатлата арат, луңтарат ханшты питас. Унта яңхтад порайн, потрат этлат. Нэпека ант ханшдалды, иса нумман тайдалды. Па ишан, Светлана Павловна ханшам луңтардал холна понылдылүв. Тумтак ёш, тумтак кур лувела!

Альбина Тырлина ханшам потар



Хор: Альбина Тырлина

# Энамты ёх форуму пилтащияты

Хор: КМНС департамент



Ас потты тылац 18-21-мет хатдтан Новый Уренгой вошан «Российский Север» нэмпи уйтантопса манты питал. Щий аратад хон мувев эдты энамты няврэмат актащдат.

Кашң тал соткем няврэм Овс, Щёпар па Халэват Пелак эдты там манты уйтантопсая ёхтыдыйл. Там елпи талатан иса Пулңават вошан верыдыса. Ин Новый Уренгой ветъяң тал постаты ураңан хол ши ун вошан акатлайт. Ар мув суң эдты ёхатты няврэмат вантлат, хоты сахат Овс муван хоятат ун вошатан улдат, муй хорпи ямат тайлат. Тунялатан щита тохдаң хоп датыдыты ялап хар омасман уса. Там хащам кат тал сьс юр, щём па ох понман ул, вош хорамаңа верты ураңан.

Мосты нэпекат Росмолодёжь.Форумы платформая 14-35 тала ювам энамты няврэмат китты верытлат. Ведщи там форуму ёхатты няврэмат ялап пидат пидан уйтантылат. Там елпи тал ёхтыдыйм мохет ялап проектлад пидан ёхатлат. Аратадан альдат, муй хорпи ямат лув мув суңдалан тыйилдылат.

Ал уйтантыты па алисыты тумпийн рахал ох ёхтаптыты. Йи миллион солкува унты проект талаңа верты ураңан ёша паятты рахал. Ай тахайт потты 1-мет хатл унты заявка нэпек [myrosmol.ru](http://myrosmol.ru) сайт мохты китты мосал. Туңа-щира [dkmns.yanao.ru/presscente...](http://dkmns.yanao.ru/presscente...) сайтан луңталан.

Алина Тоярова  
ханшам потар

## Ун кущая йиты лаңхаты мохет нэмат ястасайт

Хащам лапатан Ямал Избирком единой избирательной округ хуват ЯНАО Законодательной Собрания нийдмет пуш депутата вутщиты мохет нэмат ястас.

ЯНАО Избирательной комиссия нийдмет пуш ЯНАО Законодательной Собрания пирыты депутатат нэпекат туңа-щира лэщатас па нэмат ястас, хойтат «КОММУНИСТИЧЕСКАЯ ПАРТИЯ РОССИЙСКОЙ ФЕДЕРАЦИИ» избирательной объединения лоңман улдат.

Аратадан 38 кандидат лоңалман ул. Нэмат ястам хоятат холдыена удостоверенияйн масайт.

Там уйтантопсая ёхтыдыйм хоятат, хой КПРФ эдты единой избирательной округ эдты китман ул, удостоверений нэпекан ёша катлаптасайт: Ламдо Александр Александрович, Журавлева Людмила Анатольевна па Кукушкина Елена Михайловна.

## Пирасты манты нэпекатан па масайт

Там лапатан ветмет хатадан Ямал Избирком нийдмет пуш ЯНАО Законодательной Собрания единой избирательной округ хуват лаңхаты пирасты хоятат нэмат ястас.

ЯНАО Избирательной комиссия нийдмет пуш ЯНАО Законодательной Собрания пирыты депутатат нэпекат туңа-щира лэщатас па нэмат ястас, хойтат «Региональное отделение Социалистической политической партии «СПРАВЕДЛИВАЯ РОССИЯ – ПАТРИОТЫ – ЗА ПРАВДУ» избирательной объединения лоңман улдат.

Аратадан 30 кандидат лоңалман ул. Нэмат ястам хоятат холдыена удостоверенияйн масайт.

Там уйтантопсая ёхтыдыйм хоятат, хой СПРАВЕДЛИВАЯ РОССИЯ – ЗА ПРАВДУ эдты единой избирательной округ эдты китман ул, удостоверений нэпекан ёша катлаптасайт: Лазарев Максим Николаевич, Аюпов Эдуард Маннурович, Поленова Инна Сергеевна, Куманёва Ольга Николаевна.

## Онэлтата тохэт вантсэт



Хор: Галина Кечимова

Муравленко вочен неврэмат онэлтата тохэт вукэң ёхна йема вантлэт. Тэм ванэн интернат вантсэт па детский сад «Сказка».

Интернатэн йилдөп овпи вәри, столовайн йилдөп хот хари вәри, кемэн ар аня лыптэт омэссэт ропитта ёхна. Тэм олән онэлтэта нэңэт неврэмат пида кукольной театр верлыт, па кантэк йис верэт неврэмат пида па онэлтэдэт.

Кантэк йемэң катлэт неврэмат пида па верлэт. Кантэк кол школаин онэлтэдэт олән класс эвэлт па ирйең класс вэнта.

Галина Кечимова ханшэм потар

## Мет ямшак неврэмат кутэн нялэх кантэк неврэм вос

Тэм ванэн школа неврэмат па колледжэн онэлтэта ёк экзамен мэсэт. Мэң Муравленко вочен кантэк неврэмат па экзамен миюм кутэн восэт.

Энэл классэн онэлтэта неврэмат кутэн нялэх кантэк неврэмат вос. Хол йема экзамен мэсэт.

Колледжен эй кантэк пах мет йема экзамен миюм кутэт па вос. Чит Всеволод Михайлович Мултанов. Йема экзамен миюм пытан вукэң ёхэн сот чорэс лувела мэсы. Лув армия йэңхэс па йеды онэлтаты мэнэс.

Всеволод Мултанов нялэх опи па эй мони тойл. Аңкел па ачел вонтэн велэт давэлмэн па кул велмэн волдыт. Всеволод ин йилдөп профессия тоил сварщик нэм.

Мэң ясталэв, ат йема ропитэл, опилэд па монел ат неттыл!

Галина Кечимова ханшэм потар

# Муй щирн шоши мират таха рупитал

Суматвошн, рупатаем щирн удмежн, шоши мират таха куца нэңал Калерия Акрамовна Супрун пидн уйтантысам па оша версэм, хоты дый ин рупитлат. Мосад ястатгыя, муй щирн Калерия Супрун ёхи хащам талатн анта туп шоши нэңат ёнтасты па верантты таха куца нэңа ул. Лув ясаңдал элты япсыена оша пайтсэм, хоты Суматвош район доватан лэщатам «Югра дылдамты» па «Рут махум» («Рут хоятат») нэмпи некоммерческой тахайңанан лув ищи кущая пирыса па арсыр рупата верат туңа-щира па яма кашң тал сыс щита улты хоятат пидан ияха лэщатл.

Калерия Супрун елды потартас, муй щирн дый шоши мир тахаедн рупитгыя ёхат па нэңат кашң ялда питты емаң хатла сыр-сыр якты-арыты хотат иса верлат, ёнтаслат па ош сох пун элты хорамаң ханты муй охаль нэңат вайт сэвдат, сак пидн рупитлат па ханшийн эвтом ернасат, па нуй сахат лэщатлат.

Щалта там йисн сорт хул шанш доват элты шеңк умща сак кедат каратгыя па питсат. Щи вер тумпийн, порайн

районэд хоща улты ай куртыет элты дый хощаед туса верантты ханты па охаль нэңат иса ёхтыдылат, дый шоши мират тахаедн арсыр мастер-классат верлат па вошаң мир хоятат кашң пуш сыр-сыр ёшаң верата туңа-щира па хорасаңа елды уталдалат. Щиты Галина Вынгилева Игрим вош, Надежда Хандыбина Тэк курт, Раиса Загородняя Пухар курт па Ванзетур курт элты Лариса Дяк верантты нэңат, дый хощаед ёш рупатая уталтыгыя, арсыр хоятат Суматвоша иса ёхтыдылат.

Щалта ма инщассэм лувел, муй щирн ин дый хощаеда некоммерческой «Рут махум» нэмпи тахаед ул па рупитал. Щи верлат элты Калерия Акрамовна потартас, хоты щимащ от дый туп тата мосванан нэман лэщатсат.

Хон музев законат щирн, ванта, и тухал емаң хатлатн, молтас пормасыет, муй па думатты сохат, арсыр мойң ёхата-нэңата, шоши мир тахаед элты, лэваса ед тыныты ант эсалдайт. Щимащ верат онтасн ар щирн япсыена нумассат па юхат и номса ёхатсат, хоты общественной некоммерческой таха



К.А. Супрун.

лдыел пунштыя мосад. Ванта, щи тахаед онтасн, кашң емаң хатл верты пораятн па ал щиты улты-холты хатлатн, верантты хоятат ёшан верам пормасат муй думатты сохат, мата отат молтаса версат па ёнтсат, дый хощаеда холдыена закон щирн елды тынытыя верытлат.

Елды Калерия Супрун щимащ айкел тус, хоты дый щи тахаед онтасэдн Югра музев куца грант охат ёша пайтты щира, арсыр нэпекат округ куца ёхлува китсат. Имомтыйн па ёхды педа айкелн ёхатсайт, муй щирн дый грант охан юконтсайт. Щиңанща шоши мир таха куца щи охлад холдомтас, Суматвош районэд доватн улты хантэт па охалат ураңан «Фольклорной ашкуда» верас. Лув щи верлат элты юхат манэма тамиты потартас: «Муң уна ювам хоятлув айлтыена антома йилат. Щиты ванта, арлув, монщлув па йис потарлув иса щи хол ушталлув па ёрэмаллув. Щи ураңан айшак ёх пирщамам хоятатн япсыена

арсыр йис верата «Фольклорной ашкудайн» уталдалайт».

Щалта лув потартас, хоты Суматвош районаң шоши мир тахайн щикунш «Ма музев» нэмпи якты-арыты хот тайлат, мата отэд 2005-мет талн Раиса Петровна Загородняян туса лэщатса. Лув кушкепа щи пораятн ханты ясаңал яма уйтсалды па арсыр нэңат арытыя па яктыя уталтасды. Там йисн па шоши мир тахайн рупитты ёхат муй нэңат рут ясаңдал иса ант па уйтлат. Щи вер ураңан, хун емаң хатлата якты муй арыты хотат верлат, кашң пуш нэпек хуватн арсыр арат уталдалат. Туп тамхатл Суматвошн хулам нэ дый рут ясеңел тайлэд: Любовь Кашлатова, Зоя Сидорова па Людмила Новьюхова. Дый ин щикунш ханты ясаңан потарлат, туп потропсайдал ияха ант па рахлат.

Мет хащам кутан Калерия Акрамовна нюхмас, муй щирн дыел там Суматвош район шоши мират тахаед хоща ищи шеңк умщ рупитты. Щита улты нэңат туса ёнтаслат, сак каратгы хошлат, ханты па охаль пормасат япсыена верлат.



Ош сох пун элты сэвам посат па сорт хул шанш доват элты верам сак кедат.

# Хольмаң мормаң потар

Худантаты йис потар, йис ясаң муй па монц, хойн уйтла. Молты нупат йисн, атэд куртан, атэд ловатэдн далъюх сэварты хулам ху усат, хуцъюх сэварты хулам ху. Пирац аңкеңан-аңкеңан тайсат, дын антома йисңан. Щи юпийн, атэд куртан ултэлан, энмам ху ёшал энмас, энмам ху курал энмас. Хув усат, ван усат хойн уйтла.

Ййңалад нюрам хор кур эватлаңан, унт хор кур эватлаңан. Ай апщан ими юкана, ййңалад туты ййңки вай вусат ёнтман, лэщатман, турм сот ар хатл щи омасал. Имомтыйн, омастал, ултал кутан, номас верас. Ййңалад ййңк хул, унт вой каншам таха элты ёхатсаңан. Кашлы питсаңан, нымал ват келдан холсаңан. Щитлад лэщатты ёдн улты сонтамасңан.

Ин ай апщел лэтот каварты хоят юкана улты ху, ййңалад педа потартыйл:

– Ййңан, муң муй атэд дова-тэван, атэд куртэван, там урн атэд улдув? Нын там ййңкаң пелак кератлаңан, унтаң пелак кератлаңан, холща молты ханты улты мув, ханты яңхты юш ант педа моштасңан?

Ййңалад ясталдңан:

– Муйкем нюрм хор кур эватламан, муйкем унт хор кур эватламан, яңхты юшеман вушан нэмомты ханты улты щир ант моштасман, ханты улты вер ант па моштасман.

– Ййңан, яха унта яңхлув.

Ййңалад ясталдңан:

– Па хоты, яңхты верэн ки ул, манлув унта. Эвет йис элты, ащев йис элты хашам йи унт мин иса ант уталдасэман, лап ант шушилдэман. Питы нёхас, питы вой ал па тайл. Там, иса каншты мувеван, ванты, питы нёхас, питы вой иса шимла йис.

– Я, па щимащ мув тайлдув ки, ванты, хулам ху манты, – ай апщел ястал, – муйд атом.

– Па хоты, – ййңалад ясталдңан, – ант яңхилдйим мувева хулам хоятан манлув. Мин па пирща йиты питсаман. Яңхтэв муй атом.

Я щи, манты сонтамасат. Унт хал, ваел-куншел лэщатсат. Ат холсат. Новия ювам юпийн лаңкар ухал лэщатсат, пормаслад хушсат па унт педа манты, таласты щи питсат.

Хув мантсат, ван мантсат, алаң шушам ёх, унт патэла, холты тахаеда ёхатсат. Лэпас хар версат, тутъюх сэварсат. Тут алты пореада йис. Апщел инщасал:

– Ун яй, наң тут тайлан?

Ин отал тут каншты питсас, тут ант уйтас.

– Ант тайдам, – ястал.

Апщел кутап яйл инщасалды:

– Кутап яй, наң тут тайлан?

Кутап яйл тут каншты питас. Хирлад, хинтал ёхтылдыйл – нэмомты тут антом. Дылаң тут ант уятад, хадам тут ант уятад.

– Я, наң апщие, унтан ант яңхилдсан, мосаң наң тайлан?

– Ма па муй, – ястал, – хот лыпийн удам ху, холща тут вулам.

Ин апщан, ййңалад педа потартал:

– Карщ ун пай канштан, карщ унт пая манатан па няр наңк, няр хул тая нох хуңхилдытан. Ван муван холты тутаң хоят ул ки, ның шиялалдан.

Ун яйл ики партсалды, манас. Унт саман карщ пай каншас. Карщ няр наңк, карщ няр хул юх тая нох хуңхас па вантыйл. Маттыйн, и тахайн, унт мув лавалты, унт мув пасты икел тут адмал, наңка-худа лэл.

Ин ики ид охдас, апщалад хоцца ёхи шушмас, ёхи манас.

Апщалад педа ястал:

– Ма и тахайн тут вантсам.

Ай апщел кутап яйл педа худантман ус па щи ясат ант худсалды.

Кутап яйл ястал:

– Молты муван, молты ййңкан щи вантсан?

– Паа, – ястал ун яйл, – ин ййңкат, муват лавалты унт луңх, ур меңк икев тут адмал наңка-худа лэл. Хой хоятэн тохи манал?!

Щи кут ай апщел ёхи хашам ясат худсалды па ястал:

– Хоты, хоты потардан, ун яйм ики?

– Я па, – ястал, – унт луңх икев ун тут адмал, наңка-худа лэл.

– Па щи, тут вантсан ки, яй, тут щилта щи рахас вутыя. Яңха. Тут воха!

Я, ин апщелан партам, илямтам шукан, хоты нэрийл, манас. Щиты щи, тут вантам муват педа ун яйл ики шушмас. Хув манас, ван манас, унт луңх, ур меңк акел ики тутал хоцца ванамас.

Щи ёхтас. Ин ялань акел ики муй шанш кератал, муй хон кератал. Уңхи юхаң тут адмал, наңка-худа лэл, нэмомты ищки антом.

– Хо-хо-хо, – ястал, – хилдые, молты айкелн щи ёхатсан?

– Муй айкелн ёхатсам, – ястал. – Акем ики, муң унта ювам ёх, далъюх сэварты хулам

ху тутлы-полды ювмев. Тут вохты наң хоццаен ёхатсам.

– Хилдые, хольмаң лэңлап, хольмаң мормап потар манэм потардан ки, ма наңен молты тутыем тыңды малэм. Хадам тутэм ма малам, дылаң тутэм ма малам.

Ин ху нумасты питас: «Хольмаң лэңлап, хольмаң мормап потар ма эвет йис пора элты, ащев йис пора элты ант хулдысам. Щит хун па хойн ястам потар, холща ма улэм?»

– Акем ики, – ин ху ястал, – антом, уйтты ант уйтлам, хулдыты ант хулдысам.

– Я щи, ант ки хулдысан, ма наңен молтасам молты тутэм – дылаң тутэм, муй хадам тутэм малам.


Ин акел ики сярмтас, ху лумтам сохат ох педа нярэмасды, хулам нюки кел ху шанш элты ващмас.

– Щи, хадам тут юкана, дылаң тут юкана няр эдэнан мана!

Ин ху холта манал лэңки. Ищи юшад хуват ёхды щи шушмас.

(Елды па ул)

Алексей Сенгепов ханпсалды  
«Касум ики потрат»  
элты вуйм монц



# Ханты хоятат яха уйтантысат



Хасям лапатан ханты хоятат Луң кутоп хатл постасат. Катра по-райн, си емаң хатл, мет волаң хатла луңтасас. Ай куртатан улты хоятат си хатадан рутлад па духаслад пидан яха уйтантысат, порылдыты яңхсат: пасан опсылдысат, ох понман, щашкан лэрые юха ярсат.

Каш верты па нэпек луңатты хотатан рупитты нэдат: Ксения Егоровна Сюртахова, Фаина Анатольевна Рохтымова па Светлана Аркадьевна Литва ун

хойтата па ныврэмата касап-сайт лэсятсат. Ёхтам хоятат пасан суран потрэмисат, хорам хорат верыдысат, арысат па яксат. Пораватан Юрий Калинович Родямов гармошкайн ёнтас. Опед Валентина Семёновна па нэңиет пидан ханты арат арэмисат.

Там лопасан Пораватан па Лоркуртан верам хорат пондалдув. Вантаты па умасылдыты. Ханты емаң хатлат манты порайн, ван рут хоятдын пидан уйтантытыты па каш верты харата ёхтыдытыты.

Альбина Тырлина ханшам потар



Хор: Альбина Тырлина, Роза Накова

## Газета «ЛУХ АВТ»

Адрес редакции:  
629003, ЯНАО,  
г.Салехард,  
мкр. Богдана Кнуянца,  
д.1, каб.106  
(34922) 4-68-63  
E-mail:  
luh.avt@yamal-media.ru

## Учредитель

Департамент внутренней политики  
Ямало-Ненецкого автономного округа  
(629008, ЯНАО, г.Салехард, пр-кт Молодёжи,  
д.9, каб.708)

## Газета зарегистрирована

Управлением федеральной службы по надзору  
в сфере связи, информационных технологий  
и массовых коммуникаций по Тюменской  
области, ХМАО-Югре и ЯНАО  
19 апреля 2012 года  
Регистрационный ПИ № ТУ72-00558

## Тираж 1300 Заказ 1097

Подписные индексы:  
на год – ПА700, на полугодие – ПР561

## № 32 (1283)

Газета вышла в свет 9 августа 2025г.

Подписано в печать 7 августа 2025г.

по графику: 16.00

фактически: 16.00

Газета выходит по субботам

Цена годовой подписки 88 руб.,  
в розницу не распространяется

## Издатель

Департамент внутренней политики ЯНАО  
(629008, ЯНАО, г.Салехард,  
пр-кт Молодёжи, д.9, каб.708)

Отпечатано в АНО «Ямал-Медиа»  
Юридический адрес: 629003, Ямало-  
Ненецкий автономный округ, г. Салехард,  
мкр. Богдана Кнуянца, д.1, каб.106

Фактический адрес: 629007, Ямало-  
Ненецкий автономный округ, г. Салехард,  
ул. Чубынина, д.39А

## Генеральный

директор  
АНО «Ямал-Медиа»  
Зулинова  
Марья Андреевна

Главный редактор  
Яковлева  
Аллина Кирилловна